

«Il suveran elegia persunas e na partidas»

Partida burgais-democratica dal Grischun

DA GION NUTEGN STGIER / ANR

■ **Il president Andreas Felix ha fatg ina bilantscha positiva da l'onn passà. Er en l'avegnir vul la pbd far politica seriosa e cun clerias finamiras. Per la partida vegnan las elecziuns chantunalas 2018 ad esser ina gronda sfida.** Tradiziunalmain èn ils commembers dalla direcziun da la Partida burgais-democratica (pbd) dal Grischun s'entupads cun represchentants da las medias chantunalas tar l'apéro da Bumaun. En l'Hotel Chur è vegnì fatg viva sin l'onn nov, fatg in sguard retrospectiv da l'onn passà e fatg in sguard en l'avegnir tar quel inscunter suprem.

Lavur seriosa

Cun luschezza dastga la pbd guardar enavos sin l'onn 2017. Cun *Barbara Janom Steiner* haja la partida già ina presidenta da la regenza seriosa, fidada e cunzunt er engaschada, ha ditg *Andreas Felix*, il president da la pbd grischuna. Cunzunt en connex cun la catastrofa da Bondo l'avust 2017 haja ella prestà lavur exemplarica ed en moda cumpetenta. Ultra da quai haja ella er realisa cun success la revisiun da la lescha da vischnancas, ha menziunà Felix.

L'areal da l'anteriura resgia a Domat

Che la pbd haja da preschent cun *Martin Aebli* en sias retschas il president dal cussegl grond saja er in fatg plaschaivel. La tscherna d'*Elisabeth Von Salis* en la dretgira administrativa saja er in success per la pbd, ha punctuà Felix. *Jon Domenic Parolini*, il cusseglier guvernativ da la pbd, è cunzunt losch che la Hamilton SA ha construì sin l'areal da l'anteriura resgia a Domat in nov bajetg cun var 200 novas plazzas da lavur. Cun auters interessents sajan ins en contractivas e la Ha-

milton SA haja dal reminent già reservà auter terren per eventualmain construir in segund object sin quel areal.

Mantegnair il dumber da sezs

Las elecziuns chantunalas 2018 vegnan ad esser ina vaira sfida per la pbd, ha menziunà *Gian Michael*, il schef da fracziun. Ina finamira saja segir da defender il sez da cusseglier guvernativ *Jon Domenic Parolini*. La segunda sfida saja da remplazzar il post da cussegliera guvernativa *Barbara Janom Steiner* cun *Andreas Felix*. Da defender quel sez saja ina vaira sfida, dentant ina sfida realisabla, ha ditg

Michael. La finamira saja er da na perder sezs en il parlament grischun e da restar vinavant la terza ferma fracziun sco da preschent cun 26 sezs, ha punctuà il deputà da Donat. Da remplazzar trais corifeas sco *Andreas Felix*, *Heinz Dudli* e *Leo Jeker* saja tut auter che simpel, ha menziunà *Michael*. «Nus avain bain anc intgins auters deputads che renunzian ad ina candidatura», accentuescha il president da la fracziun da la pbd. El è dentant optimistic da remplazzar quels cun novas persunas. Guardà sin l'entir chantun saja la pbd represchentada bain en tuttas regiuns.

Tuts quatter han bunas schanzas

Gian Michael è persvas ch'ils trais cussegliers guvernativs *Mario Cavigelli*, *Jon Domenic Parolini* e *Christian Rathgeb* vegnian reelegids en lur uffizi. Ils auters quatter candidats, *Marcus Caduff*, *Andreas Felix*, *Peter Peyer* e *Walter Schlegel* hajan tuts schanzas da far il zap en la regenza. *Gian Michael* è dentant da l'opiniun che da far ina prognosa saja fitg grev. Cler è per il deputà da la Val Schons ch'il suveran vegnia ad eleger las persunas e na las partidas, gist er tar ils quatter novs candidats.



Da buna speranza per las elecziuns chantunalas: *Andreas Felix*, *Jon Domenic Parolini* e *Gian Michael* (da san.).